



# STINAPA TA INFORMA

## UN SERU DI LODO KU UN WEBU RIBA DJE

E flamingo karibense ta un berdadero beyesa. No solamente pa su plumanan ros magnífico, su forma di kabes úniko i su wowonan hel, pero tambe pa motibu di su manera di hasi. E ta move masha trankil, e por para pa oranan largu riba un solo pia, pero kuidou si hende mester yega serka! Eseinan si e no ke tin nada di haber kuné. Flamingo gusta su trankilidat masha. E trankilidat ei nan ta haña na Boneiru i p'esei nos reservado di flamingo ta e sitio di brui mas importante den henter Karibe pa e paranan akí. Ta interesante pa sa ku ta kuater lugá di brui so tin na mundu. E bruimentu ta tuma lugá den e salinanan. Tantu e flamingo komo su lugánan di biba ta protehá na Boneiru. E reservado den salinanan di Cargill pues ta hopi bon kontrolá. Asina tambe Cargill ta sòru ku den tempu di yobida e awa den e salinanan kaminda bruimentu ta tumando lugá no ta subi muchu haltu. Ta pòmp e awa ku ta di mas den laman, pa e nèshinan no disparsé bou di awa. M'a yega di haña un tur den e reservado ku un empleado di Cargill. For di un distansha hopi grandi mi a haña oportunitat di wak e nèshinan ku un vèrekeiker. E ora ei mi por a konstatá ku un lugá di brui tin aparensa di un kantidat grandi di serunan chikitu di lodo. Eseinan pues ta e nèshinan i riba kada nèshi tin un webu. E mama ku tata flamingo na bùrt ta brui e webu pa 28 te 32 dia. Ora ku e puitu sali tambe ta huntu nan ta tuma e responsabilidat pa dun'é kuminda. Despues di masoméno tres luna e yu tin bastante forsa pa hasi un biahe mas grandi, mayoria biaha esaki lo bai Benesuela. E trep akí di masoméno 80 kilometer ta ser hasí mayoria biaha ora kuminda kuminsá bira skars akinan. Un kos hopi spesial ta ku un kantidat grandi di e flamingonan ku bo ta mira awendia na Boneiru a nase akinan mes. Pero tambe gran parti di e flamingonan ku bo ta mira na Benesuela, Sürnam, Colombia, Guyana òf un di e otro islanan karibense tambe a mira lus akinan. Un Boneiru sin flamingo ta algu imposibel. E flamingo ta e símbolo mas importante di nos isla. Komprenibel, mirando ku e paranan t'akinan pa sentenáres di aña kaba. Pues nos tin un responsabilidat grandi pa mantené e poblashon di e paranan akí. Laga nos perkurá ku e paranan por keda kome, traha nèshi i brui. Esaki nos por logra solamente si nos sigui protehá nan áreanan di biba, i espesialmente NO stroba nan.

*Skirbí pa Aida Jaber, tradusi pa Marcel Nahr.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURESA



**Traha huntu na un desaroyo duradero pa Boneiru**